

## **Kálag e'só echě Paalε áténlé Timotiε Ndibned ní kálag**

Timotiε abédé kódemod echě endúbé Krístæ. Ambíd á Esia Maino. Nyaá abédéε mmwaád a Israel, sáá-'ε mod a Grikia. Ahõñné'áá Paalε ábelé-'ε nsón ní Dyõb ne mó. Kálag e'só echě Paalε áténlé Timotiε ekoo' metón meláán ahób.

Dyam dé'só, ene kálag esíme bad etúu áte átéd pónde ne ayáge dé metóm áde abédé á mwembé-te. Adén ayáge dênladtén mekan míme bad bé Israel béhídé'áá ne míme bad ábe béesě bad bé Israel béhídé'áá. Adê ayáge abédé nén bán nkõñsé míme bad bédíí áte níde ebébtéd, bán nzé mod ákũd-te e'soosõñ átãñgéné abíí mekan mé e'koñnéd ábelé-'ε mekan nêñgáne ákii donge á ndyééd ne ádyεε ésebán mod awóo' mmwaád ké'ε mmwaád awóo' nchóm. Enén kálag ehóbe ámpē ngáne bad bétãñgéné mwembé alyáged, ngáne bétãñgéné Dyõb edúbé abε, ne nyaa e abé echě bad ábe bélyágte mwembé ne ábe béwõngan á mwembé-te bétãñgéné awõñ. Asóged, Paalε alébe Timotiε ngáne átãñgéné mbaledε awe Yesu Krístæ a bwám abé ne nsón míme átãñgéné abel áfintê e bad ábe bédúbpé Krístæ.

### **Nkabtéd ní kálag**

Ndibned ní kálag *1.1-2*

Elébé tãñgene mwembé ne bad ábe bélyágte mó  
*1.3-3.16*

Timotiε akudé elébé tãñgene míme nsón *4.1-6.21*

*Paale alómmé Timotiē melēnten*

<sup>1</sup> Mē Paale, mē-εέ ntelé enén kálag. Nđii mbapεε a nlómag awě Yesu Krīstəə. Nđake echě nkúdé ábel nímē nsón ehúú ne Dyöb, mó awě asoo syánē áyāl e mbéb, ehúú-’ε ne Yesu Krīstəə, mó awě adé syánē e’lyág bé nlém. <sup>2</sup> A-Timoti, wε-εέ rítenléé enén kálag. Edíi nēngáne awem mwān mwēn, adúbe áde édúbpé Krīstəə. Nsimé, ngəl ne nsaj níme ríhúú ne Dyöb Titée awêd ne Yesu Krīstəə, Sāngwée awêd mbê ne wε.

*Paale alébe Timotiē tângene  
bemeléede bé metóm*

<sup>3</sup> Ade nkágé’áá á mbwóg e Masēdonia menláá wε mēé élyäg hē á dyad dé Efesus ábel bonj weémwāg wεé donje á bad béyágte’ ayáge áde déetāngene. <sup>4</sup> Weémwāg-ke-se ábê bad bébēbtē pónđé ákal póle éche éesě mbále ne póle éche éhóbe tângene ábāb betaa ábe mod éehelée-se atónj. Nzé béyágte échē ndín é póle épeene mpentēn, éewōngānnē bad áwónj alongé áde álúmte bán bédúbpé Dyöb. <sup>5</sup> Nzom echě enkāñ bonj nláá wε mēé éyágte bad ayáge áde átāngéné edíi ábel bonj bad bédāñ nhóg ne aníní. Etāngéné edāngē awónj éche ébide’ á nlém níme rísáá, nlém níme mbíí dyam áde átāngéné ne áde déetāngene, mbíí-’ε adúbe áde áde mbále. <sup>6</sup> Donje á bad béehidēē nímén mekan, nē ábelé bepáné nzii ahób áde béhóbéé e’kúkú é’ mekan. <sup>7</sup> Abê bad béwóó nlém áte ábé bemeléede ábe béyágte mbéndé é Dyöb bonj béēsōñtenéé mekan níme bélāngéé bad, béēsōñtenéé-’ε mekan níme béhóbéé bán békóó abíi.

<sup>8</sup> Debíí nén bán mbéndé eboó nzé bad bébenlad chó ngáne éhednad-té. <sup>9</sup> Debíí’ε nén bán Dyöb

déebeléé mbéndé áyāle bad ábe bébele' ngáne áhedéé. Boŋ Dyõb ábélé mbéndé áyāle bad ábe béehidē mbéndé ne bad ábe béebelé' ngáne áhedéé. Abélé mbéndé áyāle bad ábe béewóo Edaðəŋ é Dyõb áte, ne bad ábe bébele mbéb. Bébélé mbéndé áyāle bad ábe béewóo mbwóg ní Dyõb áte, ne ábe béhóbe Dyõb mekan mé mbéb áyāl. Dyõb ábélé mbéndé áyāle bad ábe béwúe' ábab besáá ne benyaá, ne bad ábe béwúe' bad bémpēe. <sup>10</sup> Bébélé mbéndé áyāle bad ábe békábe mesón, baachóm ábe bənaŋnad baachóm bémpēe, bad ábe békóbe bad boŋ bésóm bó nēe betāŋ, bad ábe békale metóm, bad ábe bəmwāg melě mé metóm á pónde e nkáásé ne bad ábe bébele' kéchéé éche éesě nchoo ne ngáne ayáge á bwām áhóbéé. <sup>11</sup> Adé ayáge áde nchoo ne nkalaŋ ní bwām níme Dyõb ábágé me ákale bad. Mmē nkalaŋ ní bwām níhúú ne Dyõb dé ehúmé áde bad békeneé.

### *Nságnen áyāle ngəl e Dyõb*

<sup>12</sup> Nságnan Yesu Krístəə, Sáŋgwéé awêd, mó abage me ngíne ábel nímmém nsón. Nságnan mó áyāle anyín áde anyíné aá mēbēl mó nyaa eche etəŋgéné, ápwēd-te me ábele mó. <sup>13</sup> Ambel nē, kénéé édíí bán ngen e'só nhóbé'áá mó mam mé mbéb áyāl, nítagté bad ábe bédúbpé mó, níbenlád-te e'yale bé mbéb áyāl eché. Boŋ Yesu Krístəə anwóg me ngəl áyāle menkēmpaá adúbe awóŋ, menkēmbíí-'aá chõm éche níbeleé. <sup>14</sup> Sáŋgwéé ambě me nímmē nsimé níme méesě ahəgtən, ábēl ndúbé Krístəə, ábēl-'e aá nílúmed bad bémpēe edəŋge áyāle dedé nhóg ne Yesu Krístəə. <sup>15</sup> Yesu

Křistəə ampě a nkōŋsé âsonj bebel bé mbéb. Mmēn-ne mbédé mod awě atómtánnáá mbéb abel tómaa moosyáál. Enén póle edé mbále detəŋgéné-'ε chó akonj dé adúbe. <sup>16</sup> Bonj Dyōb dénwōg me ngəl áyāle ahedé'áá aá Yesu Křistəə álúmed aá mímē nwesən méewóó'é asóg áyāl e me awě ntómtánnáá mbéb abel tómaa moosyáál. Nén dēmbenléd nēŋgáne elānsén wée bad ábe bédūbē, békūd-te alongé áde déemaá'. <sup>17</sup> Ehúmé ne edúbé bēbē ne Dyōb á ngíndé ne á ngíndé. Mó adé kəŋ echē edé á ngíndé ne á ngíndé. Mós-'aá adé ane awě bad béenyinnēē đíd awě eewág-ke. Mwěmpen-εé áde Dyōb. Ebē nē.

<sup>18</sup> A awem mwān Timoti, mekan míme rílángeé wε mεé ébel, médii mekan míme Dyōb dénlā'ē bad aá béhōb bán mébenléd áyāl echōŋ. Abē e'yale é'wēd wε áte. Abenled áde ébenladte ayáge á mbále é'bel wε ébē nēŋgáne mod awě awane nzum bwām. <sup>19</sup> Enyín-ne nén wεé móchəŋnēdē ne adúbe áde édúbpé Křistəə, ébele-'ε mekan bwām ngáne nlém rílánge wε. Donje á bad béebeléé ngáne mímab nlém nlánge bó. Nén ákáká béchénné ádab adúbe béebíi'é wée békagké. <sup>20</sup> Atíntē e bad ábe ríhóbéé nē, nhóg adé bán Himenosε, aníní-'ε bán Alesandaa. Abén bad ntědté bó á mekáá míme Satanε ábel bonj bēbii nén bán éeboo'é áhób Dyōb mekan mé mbéb á yāl.

## 2

### *Elébé tŋŋene ábe Dyōb edúbé*

<sup>1</sup> Dyam dé'só, nwéde wε aláa nén mεé nyékānnad moosyáál. Nyékānnad bad bémpēe. Nyékānne nén bán Dyōb álóme nyé bwēm ábe nyétógnéné, nyéságnan-ne mó áyāle mbonj míme

ábenléé nyé ne bad bésyāāl. <sup>2</sup> Nyékânnad kâη é bad ne bad bésyāāl ábe bédé á nkamlen. Nén débēl alongé áde syánē débē nsan ésebán mehób médé, débélé ngáne Dyöb áhede, débagé-’ε mó edúbé á menzii mésyāāl. <sup>3</sup> Akânned bad ábóó. Nén áwógte Dyöb ádé ásóó syánē menyinge. <sup>4</sup> Dyöb áhede aá moosyāál ákud e’soóson bésōηten-ne mbále echē Eyale é Dyöb ékalé. <sup>5</sup> Ebyééné nén bán Dyöb ahóg dēmpen dōó adé. Mod nhóg mwēmpen-naá adé awē apεene Dyöb ne baányon á nchemten. Ane mod adii Yesu Krīstā. <sup>6</sup> Ambě adē alongé áwé á nló mí moosyāál. Ene kwééd echē awédé á nló mí moosyāál enlúmed á pónde echē etāngéné nén bán Dyöb áhede aá moosyāál ákud e’soóson. <sup>7</sup> Ayāle nén dōó ákээ bon Krīstā álōmē me nēe mbaεε a nlomag áke dé akal nímē nkalan tēngene adúbe á Krīsto ne mbále, wēε bad ábe béesě bad bé Israel. Dyam áde ríhóbéé adé mbále. Meékālēē metóm.

<sup>8</sup> Né-óó hōm ké áhéé adé bad bé Krīsto béladnéé, nhede nén méε baachóm ábe bébágé échab yāl ábele Dyöb bényene mekáá ámīn bébage mekáne. Abé bad béētāngeneé melingá ahé á nlém káa béētāngeneé bad abé ábe bésenle’. <sup>9</sup> Nhede-’ε ámpē nén méε bebaád béhāg mesan nímé bad bényīnnē nén bán métāngéné. Mmāb mesan métāngéné bó yāl akúten bwām ésebán métēde baachóm nlém á abum. Béenabpé esid é nló nyaa echē etómé áte, béēhāg bwēm é’ gól, béēwāā’ nsan nímé bébénlé bán bé meláá mé etógnén, béēhāg-ke mbóté éche étómténé nkun abé. <sup>10</sup> Bon pen nímāb mbeltéd mí bwām rílúmed nén bán bédii bebaád ábe bébenle Dyöb. <sup>11</sup> Mmwaád atāngéné ádyēē piib, ásūdēd yāl bon áwōglān ngáne baachóm

béyágtéé. <sup>12</sup> Meehóbeé nén mæé mmwaád awóó kunze áyáged káa ákamlen baachóm. Mmwaád atánjéné ádyēē piíb. <sup>13</sup> Nhóbé nén áyāle Dyōb dénsēbē Adamε ahəg boη áhəgé' Ifε. <sup>14</sup> Ebyééné-'ε nén bán mmwaád móo Satanε ândogké boη abóó mbéndé, saké Adamε. Né-óó mmwaád móo ambóó mbéndé. <sup>15</sup> Boη Dyōb désōη alongé dé mmwaád á póndé e achád nzé adii asumé nlém wéε Krístə alúmté-'ε edəŋge ne bad bémpēe, eewóo-'ε atón dé mbéb ké ahóg áyāl.

### 3

*Paale atēnlé Timotiε t̄ηgēne belyáged bé mwembé*

<sup>1</sup> Nzé mod ahεde aá móbê nlyáged a mwembé, né apwεdé kase e nsón. Enén póle edé mbále. <sup>2</sup> Bəəb-pəó, mod awe alyágte mwembé, atánjéné abé mod awě bad béehōbēē mekan mé mbéb á yāl, atánjéné-'ε dásō mmwaád nhóg awon.\* Abé mod awě akóbe yāl, abé mod awě adole dyam áte bwâm, abé mod awě adělté yāl áte, abé mod awě akobe beken, abé-'ε mod awě abíε bad ayáged. <sup>3</sup> Eebág mod awě abagé yāl á amwé á m̄im, káa mod awě apεεne epuutéđ. Boη ábê mod awě apwiítédé, ábê-'ε mod awě eésenlé'. Eebág mod awě atómténé mənέ adəη. <sup>4</sup> Atánjéné abé mod awě achánjé eche ndáb bwâm, ábōŋgē-'ε ábe bán nyaa eché béwógnεé móo bébage-'ε móo edúbé á menzii mésyāł. <sup>5</sup> Nhóbe nê áyāle nzé mod eéhele eche ndáb akamlen, chán-nō áhēnlé mwembé ní

\* **3:2** Atánjéné-'ε dásō mmwaád nhóg awónj káa atánjéné dásō mwaád awonj ngen póg ne ngen ésyāł káa mod atánjéné dásō mwaád mwēmpen ananjed.

Dyöb akamlen? <sup>6</sup> Eetânɣeneé se abé mod awě adúbpé Krístə ekóólé ekóólé. Esebé nê, né äbē kúmbe, ch́ó ěběl ákwε, ákūd-te nkógsen melemlem ngáne Satanε ánkweé bonj ákūd-te nkógsen. <sup>7</sup> Abád ámpē, ane mod atânɣéné abé mod awě káəne bad ábe béesě á mwembé bébageé edúbé. Nén déběl éekudté akwágké éehûn-naá melám míme Satanε áhíínédé ḿ.

<sup>8</sup> Bad ábe béwōngan ábel nsón á mwembé, ébē melemlem née b́. Bétânɣéné abé á bwám awón, bébé-'ε bad ábe béhóbe dyam ne nlém nhóg. Béetânɣeneé bad ábe ábē bébágé yǎl á ámwé á mím, káa bad ábe bédé metog áyāle mone. <sup>9</sup> Bétânɣéné béhíd mbále eché Dyöb ábeleé bonj bad bébí tânɣene mewēmten míme áhedéé aá béwōn ne abé áde áhedéé aá béwōn. Bétânɣéné bébel nê ne nlém míme ḿbí chōm éche étânɣéné. <sup>10</sup> Belyáged béděhób bán bēpwεde bad ábe béwōngan á mwembé-te, bétânɣéné bad ábe béhedéé apwεd asebe dé asimεn. Nzé bényíne nén bán mod awě bésímné eewóó'é awusé ké ahóg á yǎl nê ane mod akwōgnédé ábel mímē nsón. <sup>11</sup> Káəne ábāb bebaád bétânɣéné abé á bwám awón. Béebāg bebaád ábe béhóbe bad ámbíd, bébē bebaád ábe békóbe yǎl, bébé-'ε bebaád ábe bad béhele-se bésūm nlém á yǎl ne kéchéé éche bébeleé. <sup>12</sup> Mod awě awōngan ábel nsón á mwembé atânɣéné dásō mmwaád nhóg awón. Atânɣéné abé mod awě abōnge ábe bán ne bad bēmpēe ábe bédé áwe ndáb bwám. <sup>13</sup> Nhóbe nê áyāle nzé bad ábe béwōngan ábel nsón á mwembé bébele nsón bwám, bad bébe b́ edúbé. Nén déběl béwōn nlém áhób tânɣene adúbe áde b́wóó ne Yesu Krístə.

*Dyam dé e'koṅnéd áde dēntīm abyên*

<sup>14</sup> A Timoti, kénée édíí bán nwóó nlém ápe áwōṅ mwämpīn pón dé, ndii ntenle wε enén kálag.

<sup>15</sup> Ntenle wε nímén mekan míme étāṅgéné abel ábel nén ké meélyoge ape, ehēle ebíí nyaa e abé echē bad bé Dyōb bétāṅgéné awáale. Bad bé Dyōb bóó bédé mwembé ní Dyōb, Dyōb ádé-'ε á alonḡé. Mmé mwembé móó rídé nēṅgáne akon ne nsáaned míme ríchāṅgé mbáale Eyale é Dyōb bwām. Ahed dó-'aá ene mbáale ébwógnédé. <sup>16</sup> Dyōb ábélé syáā debíí nén bán nímē nkalanḡ ndé etógnén bwāmbwam. Ndé nén bán:

Krīstæ ampě, abé-'ε moonyonḡ,

Edæádəṅ éche Esáá énlūméd sé nén bán adii Mwān a Dyōb,

ángel-ε énnýīn mó.

Bēnkale bad bé nkōṅsé bésyāāl, béndūbē-'ε mó.

Dyōb dēmpuúd mó ákē-'ε ádyōb ne ehúmé ésyāāl.

## 4

*Paale alébé Timotiε tāṅḡene bemeléede bé metóm*

<sup>1</sup> Edæádəṅ éche Esáá énhōb bwām nén aá, nímén mesú donḡe á bad bétédé adúbe á mbáale ádāb, bédūbpē bad ábe báyḡte ayáḡe dé metóm. Adén ayáḡe dōó e'dæádəṅ bé mbéb é'hedεé aá bédúbe.

<sup>2</sup> Abén bad bébele' byánán békale mbáale bon metóm móó békaleé. Nzé báyḡte chōm éche éetāṅḡene bélūmte nén bán béebii'ε nḡḡlén áfínté chōm éche étāṅgéné ne éche éetāṅḡene. <sup>3</sup> Abén bemeléede bé metóm, báyḡte bad bán béewōṅné, bán bad béedyāḡ-ke donḡe dé medyé. Dyōb dēnhāḡ nímē medyé ábel nén bad bedyāḡ mó. Bad ábe bébíí nkalanḡ ní bwām, bédúbpé mó,

béságnanne Dyõb áyāle nímê medyé. <sup>4</sup> Abê be-  
meléede béētāηγενεέ, áyāle kéchéé éche Dyõb  
áhágé ébóó. Nzom ké póg eesaá ábán donge dé  
medyé. Né-ᵛó, déságnen Dyõb akud áde dékudεé  
ábén bwēm. <sup>5</sup> Mod eékīē ndyééd, áyāle Eyale é  
Dyõb ne mekáne bébele chó ébon adyé.

*Paale aláηgé Timotiε  
ngáne átāηgéné mbaledε  
a bwám awe Krīstā abé*

<sup>6</sup> Nzé eyágte bad ábe bédúbpé Yesue nímén  
mekan né wēbē mbaledε a bwám awe Yesu Krīstā.  
Wéwēdnēd-te áte á edāádāη-tē áyāl e nkalanη níme  
édúbpé ne áyāle ayáge dé eyale é Dyõb áde éhídεé  
ámíid. <sup>7</sup> Weewóó dyam dé abelen ne pāle éche  
élúmte bán bad béedúbpεé Dyõb, ne e'yókél é' pāle.  
Bon pen éyágke' pónidé té ábel ngáne Dyõb áhedεé  
aá ébel. <sup>8</sup> Edé etógnén mod áyáged yāl e nkōηsé,  
āwéd chó áte. Bon étómténé etógnén abé nzé  
mod awédé yāl áte ábel ngáne Dyõb áhedεé áyāl e  
chōm ésyāāl. Débel ngáne Dyõb áhedεé áyāle, Dyõb  
áhóbé aá mósōbē syánē alonḡé áde déemaá', bōōb ne  
á pónidé echē ehúε'. <sup>9</sup> Adén dyam áde nḡóbé nén  
ádé mbále. Nyētāηgéné dó adúbe. <sup>10</sup> Né-ᵛó, nén dōō  
ákáá bon dényᵛdé, déwanté-'ε yāl áte áyāle delyágé  
nlém ne Dyõb áde áde á alonḡé. Mó abage baásyāāl  
e'soóson, bwāmbwam bad ábe bédúbpé mó.

<sup>11</sup> Nyín nén wεé mólāηḡē bad ábe bédúbpé nímén  
mekan, wεé mýágtē-'ε bó mó. <sup>12</sup> Weémwāḡ-se  
modmod anyín wε nkōηtéd áyāle édíí kódemod.  
Bon pen lúmed bad ábe bédúbpé abé a bwám ábel  
bon bómpē bébel melemlem. Nyaa echē éhóbεé  
dyam, abé áde éwóó, nyaa echē édáá bad, nyaa

éche édúbpé Dyöb ne abel áde wéebeléé mekan mé mbinde ábê née elánsén wée bad ábe bédúbpé. <sup>13</sup> Enyín nén wée mólāa' Eyale é Dyöb nzé bad béládné á mwembé-te. Elánge bó chóm éche échê Eyale é Dyöb éhóbée, éyágte-'ε bó kááη né mpedé. <sup>14</sup> Weétedté nsón míme Dyöb ábágé wε née ndε, áláa bad mekan míme Dyöb dénhōbpē aá éláa bó á pónde eche belyáged bé mwembé bémbānnē wε mekáá á nló. <sup>15</sup> Belé nímén mekan ne nlém nhóg ábel bon baásyāal bényín nén bán ebεle mó bwām, ekεene-'ε mó á'sō. <sup>16</sup> Etōη yāl acháa bwām ne kéchéé éche éyágteé bad. Kεené' nē á'sō, ábel bon Dyöb áson wε alongé, ásōη-'ε alongé á bad ábe éyágteé.

## 5

### *Paale alángé Timotie ngáne átāngéné donje á bad acháa á mwembé-te*

<sup>1</sup> Weekánné mod a mbáá áte. Cháá mó melem ngáne ehεe-se echáá sóó mwēn. Cháá bad ábe béepede wε kōd née baányon bé baachóm. <sup>2</sup> Cháá bebaád bémbáá nēngáne éhεléε-se echáá nyoó mwēn. Echáa-'ε ngōndéε née baányon bé bebaád. Weewōηné bó mekan mé mesón á mewēmtεn.

<sup>3</sup> Bekúd ábe béewóo bad ábe bēnōne bó éwōηgan bó. <sup>4</sup> Bon nzé nkúd achyáá bán káa bán ábe ábē bán, bétāngéné mó atōgen. Nén ádé dyam dé'só áde bad ábe bébele ngáne Dyöb áhedéé bétāngéné abel. Abāb benyaá ne besáá bēntōgén bó, bómpē bétāngéné bó atōgen. Nén áwógte Dyöb menyīnge. <sup>5</sup> Nkúd awē adé mwēmpen bon eewóo mod awē awōηgan mó, wée Dyöb dēmpen dōo ályágεé nlém. Abē ákānne', áhedne-'ε mó nwōηgen nkuu ne

mũte. <sup>6</sup> Boŋ nkúd awě asólté yǎl á mekan mé nkõŋsé, awédé á edæádæŋ, kénéé ádíí á alongé. <sup>7</sup> Láá bad bé mwembé rímén mekan ábel boŋ mod eehóbé bó mekan mé mbéb á yǎl. <sup>8</sup> Nzé mod a Krĭsto eétõgné bad bé túmbé ábē, bwāmbwam áde abum a ndáb, né alúmte nén aá mósódúbpéé Krĭstæ. Ene ndín e mod rímē mbeltéd rílúmte nén bán adii mod awě abelé mbéb tómaa mod awě eedúbpé Krĭstæ.

<sup>9</sup> Nkúd awě éhele-se etóŋ weé atáŋgéné nwõŋgen akud, adii nkúd awě atómé móom mé mwě ntóób. Atáŋgéné abé-’ε nkúd awě a nwóŋ nchóm nhóg mwěmpen. <sup>10</sup> Ane nkúd atáŋgéné abé mmwaád awě bad bényíne bán míme mbeltéd ríboó. Atáŋgéné abé mmwaád awě apééné bán ámĭn bwām, abé mmwaád awě akobe beken awe ndáb bwām, abé mmwaád awě asudte yǎl, ábenlé bad bé Dyõb nyaa echě áwóbpé’áá bó mekuu. Atáŋgéné mmwaád abé awě awóŋgéné bad ábe bémbē á ndutul-tê, ábē-’ε eche yǎl ábel mekan mé bwām. <sup>11</sup> Boŋ weetóó bekúd ábe bédé etum nêŋgáne bekúd ábe békud nwõŋgen. Weetóó bó áyāle nzé béwóó esíí áwóŋ bechóm ámpē béebeléé Krĭstæ ngáne éhednadté. <sup>12</sup> Nzé béwóó-’ε bechóm bémpēe né békwógnédé ákud nkógsen, áyāle béelõntéé akag áde bénhēē nén bán bébelé Krĭstæ. <sup>13</sup> Saá-kaá nê dēmpen, béwóó abé áde béebeléé chõm, béhyóme ndáb ne ndáb. Amĭn enê béhóbe bad ámbíd, béhāg nsəl áyāl e mekan mé bad, béhóbe-’ε mekan míme bénkěntáŋgěnné ahób. <sup>14</sup> Né-ᵛó, ndæá mēé e’tum bé bekúd béwóŋ bechóm, béchyáa bán, bébõŋge-’ε échāb ndáb. Nén débēl béebeléé mekan rímé bad ábe békóó syánē béhōbēē

syánē mekan mé mbéb á yǎl. <sup>15</sup> Nhóbe nén áyāle ábén bekúd donje bébóótédé mekan abel míme Satanε áhεδέε áá bébel. <sup>16</sup> Mmwaád ké ahéé awě adúbpé Krístəə awě awóó bekúd áwē abum á ndáb, atánǵéné bó atóǵen, saké nén bán ápêmted mwembé mímē nted. Nén débǔ mwembé etál ábóo bekúd ábe béewóo bad ábe bébónge bó.

<sup>17</sup> Mwembé mβε bad bémbáá ábe belyágte bó bwâm edúbé ne nsábe, bwâmbwam ábê belyáged ábe bébele nsón mé akal ne áyáged Eyale é Dyöb. <sup>18</sup> Edé nê áyāle éténlédé á kálag e Dyöb nén bán, “Weetádé nyag nsəl eche esálte ngun.” Eténlédé ámpē nén bán, “Bebel bé nsón bétánǵéné mímab nsábe akúd.” <sup>19</sup> Weedúbpé mekan míme bad béhóbεé belyáged bé mwembé áyāl, éetómεé né mbónǵ éβε káa éláán étyéémé nén bán nê ádé mbále. <sup>20</sup> Nzé mod ámbáá a mwembé abelé mbéb, káné mó áte á’sō é’ mwembé ábel bon bad bémbáá bémpēe bébánǵ mbéb abel. <sup>21</sup> Nlánǵe wε á’sō é Dyöb ne Yesu Krístəə ne á’sō é ángel éche épwédnéde méé ébel chöm eche étánǵéné abel, ésebán ekwognad modmod. Weétímē-’ε modmod ambíd. <sup>22</sup> Weewámsán mod mekáá abán á yǎl áwóged mó mod a mbáá a mwembé. Nzé ebelé nê bon ane mod atímé mbéb abel, ne wémpē ebelé mbéb. Mmōǵ weébēlē mekan mé mbinde. <sup>23</sup> Weemwág mendíb mwēmpen ámpē. Mwág mwǎ mím ábel nén abum áde ákwaglan wε áte pónde ésyāal ámaa.

<sup>24</sup> Donje á bad bébele mbéb á nhéné míme moosyǎl ábíí, békāād-te bó. Abíníí-’ε bébele mbéb á mesōm-tê míme bad béébíí’ε káǵn né béhéde áte. <sup>25</sup> Melemlem nê dóo donje á bad bébeleé

mboŋ níme níbyééné ne moosyáál. Bém̄p̄ē-’ε béb̄ele mboŋ a mes̄om-té níme bad béēb̄ii’έ káŋŋ né béhédé áte.

## 6

<sup>1</sup> Bad ábe bédé bet̄an̄ bésyāāl bet̄an̄géné bébage bad ábe bédíi ásē echāb edúbé ábel boŋ modmod eehóbé Dyöb mekan mé mbéb áyāl, eehóbé-’ε ayáge ádēd mam mé mbéb áyāl. <sup>2</sup> Bet̄an̄ ábe bédé ásē e bad ábe bédúbpé Kr̄ist̄æa béēwēmt̄an̄ bán ngáne ábab besáá bédíi bad ábe bédúbpé, béet̄an̄γενεέ bó edúbé abε. Bét̄an̄géné bó abεle tómaa ngáne béhélé’áá-sε béb̄ēl̄ē bad ábe béedúbpε Kr̄ist̄æa. Bét̄an̄géné ábel nê áyāle ábab besáá ábe bébenlεé bédíi bad ábe bédúbpé Kr̄ist̄æa béb̄é-’ε bad ábe ábāb bemb̄aledε bédáá-’ε.

*Paale ah̄be t̄an̄gene ayáge dé metóm ne nh̄on níme nt̄an̄géné*

Eyágte bad nímén mekan éwēd-te bó nlém á abum áhíd mó. <sup>3</sup> Don̄ge á bad bédé ábe béyágte’ ayáge áde déet̄an̄gene. Adab ayáge déesaá melemlem ne ayáge áde awεd Sán̄gú Yesu Kr̄ist̄æa áde ayágte bad ábel ngáne Dyöb áhεdεé. <sup>4</sup> Ab̄ē bad bélóné ne kúmbe, béēb̄ii-’áá dyamdyam. Nyaa ech̄ē áb̄ē bad bédáá mpent̄en mé e’yale ne nsεlag edii bó née nkole. Nén áp̄εene kón̄j̄i áf̄int̄é echāb, áp̄εené mehób áf̄int̄é echāb, bad béh̄ōbē-’ε baáb mehób mé mbéb áyāl, béwōŋnē nh̄óg ne aníníi mewēmt̄en mé mbéb. <sup>5</sup> Nén ábεle-’ε bépentan pón̄dé té nyaa ech̄ē béehelée-sε béb̄ii ch̄ōm éche ét̄an̄géné. Béehelée-sε bésōŋt̄én ch̄ōm éche édé mbále ne éche ées̄ mbále. Béwēmt̄an̄ bán nzé bébenle Dyöb, né bébē

nhən. <sup>6</sup> Boŋ mod äbē menyiŋge bwâmbwam nzé abele' ngáne Dyöb áhedeé nzé atéde-'ε aá kéchéé éche mówóó ékwógnédé mó. <sup>7</sup> Depedé á nköŋsé, deépeεneé chömchöm, nzé dewédé-'ε, déeswéénné chömchöm. <sup>8</sup> Né-óó, nzé dewóó ndyééd eche dédyāgkē ne chöm éche déhāgkē á yāl, né nê ákwógnédé syānē. <sup>9</sup> Boŋ bad ábe béhede nhən asud, bébelé béhún á mekəgsen-tê, bébé ngáne bad ábe békwdé melám. Bébelé béhedé mekan Abel híin níme mééboo ne mekan híin níme mééboŋne bó. Nén ábele bétage bwâmbwam. <sup>10</sup> Mod ké ahéé awě awóó nlém áte bwâmbwam ábud mənέ awón, abelé ábelé' e'bébtéd é' mekan ákud níme mənέ. Nê ábélé donge á bad bétédte ádube Krístə, békúde-'ε ndutul híin á nlém tê.

### *Paale abagé Timotiε elébé*

<sup>11</sup> Boŋ wε, á-Timoti, mod a Dyöb, bán ábé e'bébtéd é' mekan. Nané mekan ámbíd níme métāŋgéné á'sō é' Dyöb, édəŋ bad, éwesən pónde ésyāāl, épwiited-tε. <sup>12</sup> Wéd yāl áte ébê ésum nlém wéε Dyöb ébenle-'ε mó. Alongé áde déemaá' áde Dyöb ábágé wε, wéd dó achāned. Dyöb dēmbě wε áde alongé áde wénhōbpē á'sō é' bad híin wéé módūbpē Krístə. <sup>13</sup> Á'sō é' Dyöb, mó awě abage bwēm ésyāāl alongé, ne á'sō ábe Yesu Krístə, mó awě ankal mbále á'sō wéε Pontus Payledε, nlāŋge wε nén meé, <sup>14</sup> ébele chöm ésyāāl ngáne Dyöb áhóbé aá ébel, káəŋne pónde eche awed Sāŋgwéé, Yesu Krístə ápeé. <sup>15</sup> Apě á epun éche Dyöb Titée átíídé aá ápe, Dyöb ane awě ábē bad bébageé mekanag. Mwēmpen-naá adé Nkamlenε a mbáá a nköŋsé ísyāāl. Mó adé Kāŋ e kāŋ ésyāāl abé-'ε Sāŋgwéé a besāŋgwéé bésyāāl. <sup>16</sup> Mwēmpen-εé

awóó ngíne âbé á alongé á ngíndé ne á ngíndé, adé-  
'ε á e'nyinεn bé ekíde ábe é'pene bwâmbwam nyaa  
echê modmod éehelée-se ápē benben. Mó adé ane  
awê modmod éēnyīnēē mbêd, modmod eéhēlēē-'ε-  
se anyīn mó. Edúbé ébê ne mó, ābē-'ε á nkamlen á  
ngíndé ne á ngíndé. Ebê nê.

<sup>17</sup> Síim bad ábe bédé nhon etúu áte nēn wεé  
béekumé ekáá á tâl, béesumé-'ε nlém áyāl e nímāb  
nhon, bwēm ábe é'maa', bon bésūm nímāb nlém  
wéε Dyōb. Mó adé ane awê abage syānē chōm  
é'syāāl éche détógnéné ábel bon débê menyīnge.

<sup>18</sup> Láá bó wεé bébele mbon áwōngēn bad, ngáne  
bad ábe bébúdé mōné awōng bēbāgkē nhon, mekan  
mé bwām níme bébeléé mbê nímāb nhon, bēwōn-'ε  
nlém áwōngēn bad ne kéchéé éche Dyōb ábágé bó.

<sup>19</sup> Nzé bad bébele nēn ébē nēngáne békōngé nímāb  
nhon ádyōb. Nēn débē nēngáne nsáaned níme  
nísúmnédé bwām ábel bon nísōgtēn mekan níme  
méhúε' á'sō ábel békud alongé dēn áde ákōjté  
alongé abé.

<sup>20</sup> A-Timoti, nsón níme Dyōb ábagé wε tōn  
mó acháa. Weewóó pōndé ne mehób níme bad  
béhóbεé níme méēwōngān ábe Dyōb edúbé, ne  
mehób níme donge á bad béhóbεé bán chōm  
ehóg édé mbále, bad bēmpēe-'ε béhōbē bán chōm  
ēmpēe chōo édé mbále. Bon bó moosyāál bébele  
awusé nzé béhōbe bán, "Mε-εé ndé mod awe abíí."

<sup>21</sup> Donge á bad ábe bēwēmtan bán bēbíí mam  
níme médé, bon bēn béekoó'ε adúbe áde Dyōb á  
mbále ahíd.

Nsimé n Dyōb mbê ne nyé moosyāál.

**Mel̃ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files dated 29 Jan 2022

0143729f-907e-5098-b6ce-63b1629b8e48